



KERAJAAN NEGERI KELANTAN
PEKELILING KERAJAAN TEMPATAN BILANGAN 2 TAHUN 2025

GARIS PANDUAN HIBURAN DAN SUKAN NEGERI KELANTAN 2025

1. TUJUAN

- 1.1 Pekeliling ini bertujuan untuk memberikan garis panduan terkini sebagai rujukan kepada pegawai pelesen, pengiat hiburan dan sukan, pihak awam dan pihak yang ingin menganjurkan program hiburan dan sukan di Negeri Kelantan, memperincikan syarat-syarat khusus secara lebih jelas supaya program hiburan dan sukan dapat berjalan lancar dan selesa berdasarkan Enakmen Kawalan Hiburan dan Tempat-Tempat Hiburan (Kelantan) 2025.

2. LATAR BELAKANG

- 2.1 Definisi hiburan menurut Dewan Bahasa dan Pustaka adalah sesuatu (perbuatan atau benda) untuk menghiburkan, menyenangkan dan menenteramkan hati.
- 2.2 Manakala, definisi sukan adalah segala aktiviti atau kegiatan yang menggunakan ketangkasan atau kemahiran beserta tenaga.
- 2.3 Hiburan dan sukan diperlukan bagi tujuan menenteramkan jiwa dan menjaga kesihatan. Agama Islam tidak pernah menghalang umatnya berhibur dan bersukan. Namun, hiburan dan sukan mestilah berpandukan syariah agar tidak melampaui batas.
- 2.4 Pihak Kerajaan Negeri telahewartakan Enakmen Kawalan Hiburan dan Tempat-Tempat Hiburan (Kelantan) 2025 yang baru dimana enakmen ini adalah lebih komprehensif dan praktikal penggunaannya.

- 2.5 Penggubalan enakmen baru juga disertakan dengan penggubalan Peraturan-Peraturan Kawalan Hiburan dan Tempat-Tempat Hiburan (Kelantan) 2025 untuk membantu pegawai pelesen, pengiat hiburan dan sukan serta pihak awam melaksanakan program hiburan dan sukan tanpa kekeliruan.
- 2.6 Pada tahun ini, Garis Panduan Hiburan dan Sukan Negeri Kelantan 2025 yang baru dikeluarkan bagi menggantikan Garis Panduan Kawalan Hiburan 2003 yang berfungsi sebagai rujukan kepada semua pihak yang terlibat dengan program hiburan dan sukan di Negeri Kelantan untuk panduan yang lebih lengkap.

3. KAWALAN PERSEMBAHAN HIBURAN

- 3.1 Hiburan di bawah kawalan Negeri Kelantan ditafsirkan mengikut Seksyen 3 Enakmen Kawalan Hiburan dan Tempat-Tempat Hiburan (Kelantan) 2025 yang bermaksud mana-mana hiburan yang baginya Enakmen ini terpakai.
- 3.2 Seksyen 2 Enakmen Kawalan Hiburan dan Tempat-Tempat Hiburan (Kelantan) 2025 menyatakan bahawa Enakmen ini hendaklah terpakai bagi hiburan yang dinyatakan dalam Jadual di mana-mana tempat yang orang ramai boleh mendapatkan akses sama ada dengan atau tanpa bayaran wang atau balasan-balasan lain atau di mana orang ramai dipelawa mengambil bahagian dengan membayar fi. Tegasnya selagi adanya persembahan bagi mana-mana jenis hiburan yang melibatkan orang ramai sama ada di majlis rasmi, persendirian atau peribadi ianya adalah tertakluk kepada prosedur dan kawalan Enakmen Kawalan Hiburan dan Tempat-Tempat Hiburan (Kelantan) 2025.
- 3.3 Sukan dan pertandingan sukan antara apa-apa bilangan orang atau binatang juga disenaraikan sebagai hiburan di bawah Jadual.
- 3.4 Hiburan dan sukan yang dilarang
 - 3.4.1 Hiburan yang dilarang adalah segala jenis hiburan yang melanggar dengan hukum syarak dan mengandungi unsur-unsur seperti khurafat, syirik dan perjudian.
 - 3.4.2 Sukan yang dilarang adalah segala jenis sukan yang berisiko tinggi dan boleh menyebabkan kemudaratan kepada fizikal, mental dan spiritual serta tidak memberi manfaat kepada para atlet, penganjur dan orang awam.

- 3.5 Larangan ini meliputi semua peringkat persembahan yang mempunyai unsur-unsur atau ciri-ciri hiburan dan sukan yang dilarang tersebut.
- 3.6 Hiburan dan sukan yang dikawal selia melingkungi semua jenis dan kelas hiburan dan sukan secara tradisional atau moden yang perlu dikawal selia tertakluk kepada Enakmen Kawalan Hiburan dan Tempat-Tempat Hiburan (Kelantan) 2025, Peraturan-Peraturan Kawalan Hiburan dan Tempat-Tempat Hiburan (Kelantan) 2025 dan Garis Panduan ini.

4. ELEMEN-ELEMEN DAN SYARAT-SYARAT HIBURAN

- 4.1 Artis / Pengamal Seni – iaitu orang yang mempamerkan karya hiburan untuk tontonan umum. Mereka termasuklah pelakon, penyanyi, pemuzik, pelawak, penari, penyajak, pengacara dan penggiat / pengamal seni kebudayaan.
- i. Artis / pengamal seni hendaklah berpakaian menutup aurat bagi yang beragama Islam. Artis / pengamal seni lelaki yang beragama Islam hendaklah berpakaian menutup aurat dengan memastikan antara pusat hingga kedua-dua lutut adalah tertutup. Artis / pengamal seni wanita yang beragama Islam hendaklah menutup seluruh tubuh badan kecuali muka dan kedua-dua telapak tangan. Aurat hendaklah ditutup dengan sempurna tanpa menampakkan bentuk badan atau bayangan daripada luar.
 - ii. Artis / pengamal seni yang bukan beragama Islam hendaklah berpakaian sopan dengan maksud pakaian tidak terlalu ketat, singkat dan jarang semasa melakukan persembahan.
 - iii. Artis / pengamal seni lelaki dibenarkan membuat apa-apa persembahan kepada khalayak umum di hadapan lelaki dan wanita di tempat yang terbuka.
 - iv. Artis / pengamal seni wanita secara umumnya hanya dibenarkan membuat persembahan kepada khalayak wanita sahaja di tempat yang tertutup.
 - v. Namun begitu, terdapat beberapa pengecualian dimana artis / pengamal seni wanita dibenarkan membuat persembahan kepada khalayak umum di hadapan lelaki dan wanita di tempat yang terbuka seperti berikut:-

- a) Persembahan sajak, puisi, pantun, syair dan lain-lain persembahan yang seumpamanya berbentuk keagamaan;
 - b) Persembahan sajak, puisi, pantun, syair dan lain-lain persembahan yang seumpamanya berbentuk patriotik;
 - c) Menjadi pengacara majlis namun lebih digalakkan pengacara majlis lelaki untuk majlis yang terbuka kepada khalayak umum; dan
 - d) Pengecualian juga diberikan kepada kanak-kanak perempuan berumur 12 tahun ke bawah. Kanak-kanak perempuan berumur 12 tahun ke bawah dibenarkan untuk membuat persembahan kepada khalayak umum di hadapan lelaki dan wanita di tempat yang terbuka.
- vi. Pakaian artis, tatarias dan dandanan rambut mestilah tidak menyerupai jantina yang berlainan, serta dengan kadar bersederhana yang sesuai dengan uruf masyarakat.
 - vii. Artis atau penghibur perlulah dari kalangan artis yang mempunyai rekod peribadi yang baik.
 - viii. Artis yang mempunyai rekod buruk seperti terlibat dalam penyalahgunaan dadah dan perlakuan buruk adalah dilarang.
 - ix. Artis / pengamal seni yang dikaitkan dengan kontroversi melibatkan aktiviti-aktiviti *Lesbian, Gay, Bisexual, Transgender, Queer* dan *Plus (LGBTQ+)* adalah tidak dibenarkan membuat persembahan.
 - x. Tiada unsur-unsur yang menyalahi undang-undang yang berkuat kuasa di Malaysia diketengahkan oleh artis semasa membuat persembahan.

✓ 4.2 Nyanyian – iaitu kata-kata yang bernada dan dialun secara berlagu menggunakan suara, yang biasanya diiringi oleh irama muzik. Ia mengandungi unsur lirik, rentak lagu dan alat muzik.

- i. Lirik – iaitu susunan kata-kata atau perkataan yang menjadi seni kata nyanyian yang didendangkan.

- a) Mesej yang disampaikan mestilah mendorong ke arah kebaikan.
 - b) Mengandungi unsur-unsur murni yang tidak bertentangan dengan akidah, syariat dan nilai-nilai Islam serta tiada unsur menafikan, menokok tambah atau menyelewengkan mana-mana ajaran Islam.
 - c) Menggunakan ayat-ayat Al-Quran dan Hadith dengan tujuan yang betul seperti memberikan tafsiran yang tidak menyeleweng daripada maksud sebenar Al-Quran dan Hadith.
 - d) Mengandungi unsur kesejahteraan dan tidak memecahbelah keharmonian dan keamanan yang menyentuh sensitiviti institusi Raja, keagamaan dan perkauman.
 - e) Mengandungi unsur keimanan dan kepercayaan yang tidak berunsur pemujaan dan taasub kepada makhluk.
 - f) Mengandungi unsur kemuliaan dan mengelakkan daripada unsur penghinaan dan fitnah kepada mana-mana pihak.
 - g) Mengandungi unsur dorongan dan daya juang dengan tidak mengundang provokasi terhadap mana-mana pihak.
 - h) Mengandungi unsur sopan dan tidak lucah.
 - i) Lirik lagu yang disampaikan tidak mempunyai unsur maksiat, lagha, merangsang keghairahan nafsu dan sebagainya menerusi tema-tema cinta yang melampau, luahan perasaan dan kerinduan yang berlebihan kepada manusia.
- ii. Rentak lagu – iaitu kaedah artis mengalunkan lirik mengikut irama muzik tertentu.
- a) Rentak lagu yang disampaikan mestilah membawa kepada suasana yang positif.
 - b) Rentak lagu hendaklah berbentuk mendorong penonton melakukan tindakan yang baik dan tidak merosakkan adab kesopanan serta menimbulkan fitnah seperti melompat, menjerit dan bersorak dalam keadaan di luar kawalan.

- c) Mempunyai unsur keimanan dan keagamaan yang tidak bersifat pemujaan kepada agama lain.
- d) Membawa kesentosaan dan ketenteraman mesyarakat awam seperti tidak menimbulkan bunyi bising melampau berdekatan rumah ibadat dan kawasan perumahan pada waktu sembahyang.

III. Peralatan Muzik

- a) Bacaan Al-Quran, bacaan Hadith atau tazkirah agama Islam tidak boleh diringi oleh alunan muzik semasa persembahan.

4.3 Tarian – iaitu gerakan anggota badan secara berirama dan tersusun mengikut rentak muzik.

- i. Gerak tari mempunyai nilai murni dan tidak berunsur pemujaan atau penyembahan secara langsung atau tidak langsung kepada sesuatu makhluk atau peribadi lain.
- ii. Gerak tari beretika mulia tidak menimbulkan fitnah atau memberahikan walaupun dipersembahkan oleh mana-mana pihak.
- iii. Persembahan tarian oleh artis wanita hanya dibenarkan kepada khalayak wanita sahaja dan diadakan secara tertutup.
- iv. Wujud pengasingan antara lelaki dan perempuan dalam satu persembahan supaya tiada percampuran yang boleh menimbulkan fitnah bagi persembahan yang melibatkan kanak-kanak perempuan berumur 12 tahun ke bawah.
- v. Mempunyai unsur-unsur pujian tanpa penghinaan terhadap agama, kaum dan negara.
- vi. Selari dengan kehendak syarak dan uruf masyarakat setempat.

4.4 Seni pentas, lakonan dan tayangan video sukan, patriotik dan keagamaan.

- i. Skrip, ucapan dan gerak laku semasa persembahan hendaklah selari dengan akidah, syariat dan nilai-nilai Islam.
- ii. Skrip persembahan hendaklah mengandungi nilai-nilai kesejahteraan sejagat yang tidak berunsur keganasan, fitnah, kata-kata kesat, lucah atau menimbulkan sindiran melampau atau penghinaan terhadap mana-mana individu dan organisasi.
- iii. Percampuran lelaki dan perempuan adalah dalam keadaan terkawal, mengikut syariat dan tidak membawa kepada fitnah.
- iv. Plot penceritaan hendaklah selari dengan tuntutan syariat dan akidah islam.
- v. Sensitiviti mana-mana agama, budaya dan kaum hendaklah sentiasa dipelihara.
- vi. Tiada percampuran di antara lelaki dan wanita yang bukan mahram di satu tempat tanpa sekatan dan had sehingga membawa kepada persentuhan lelaki dan wanita ajnabi, tidak berlakunya acara minum arak, pertaruhan judi dan lakonan-lakonan liar dan seumpamanya.

4.5 Penganjur

- i. Mestilah mendapatkan kebenaran Pegawai Pelesen sebelum sesuatu program dianjurkan.
- ii. Memelihara kebersihan tempat hiburan dan menjaga keselesaan dan kebajikan penonton melalui kerjasama dengan mana-mana agensi yang telah diwujudkan kolaborasi.
- iii. Pentas hendaklah berada pada kedudukan yang sesuai dan kekukuhan pentas adalah tanggungjawab pihak penganjur.
- iv. Mengadakan aktiviti / program hiburan di kawasan atau lokasi yang bersesuaian dan tidak dianggap tersembunyi atau terselindung daripada awam yang boleh mendatangkan keraguan dan syak.
- v. Minuman yang memabukkan dan pertaruhan judi adalah tidak dibenarkan sama sekali sepanjang program berlangsung. ✓

- vi. Memastikan jurusolek lelaki adalah untuk artis lelaki manakala jurusolek wanita untuk artis wanita. Jurusolek juga mestilah sentiasa menutup aurat bagi beragama Islam dan berpakaian sopan bagi bukan beragama Islam.
- vii. Menyediakan tempat persalinan pakaian yang berasingan untuk lelaki dan wanita di bahagian belakang pentas.
- viii. Penyediaan tempat khas untuk penonton yang datang secara berkeluarga adalah digalakkan.
- ix. Penganjur bertanggungjawab memastikan kawalan keselamatan bagi keseluruhan program hiburan yang mencukupi dan memenuhi kehendak Pegawai Pelesen.
- x. Memastikan ada pengasingan bagi pengunjung lelaki dan pengunjung wanita bagi keseluruhan hiburan.
- xi. Penganjur juga bertanggungjawab memastikan artis luar negara mempunyai dokumen-dokumen yang sah yang diperlukan di sisi undang-undang berkaitan jika terdapat penglibatan artis dari luar negara dalam hiburan yang dianjurkan.
- xii. Penganjur bertanggungjawab untuk menyediakan suatu kotak pertolongan cemas yang mengandungi alat dan kelengkapan pertolongan cemas yang sesuai sebagaimana berikut:-
 - a) enam pembalut disteril, setiap satu berukuran tidak kurang daripada 7.6 sentimeter x 7.6 sentimeter bagi luka dan luka terbakar;
 - b) satu gulung / kotak kapas yang disteril tidak kurang daripada 300 gram;
 - c) dua gulung kain pembalut, setiap satu berukuran tidak kurang daripada 7.6 sentimeter x 5.5 sentimeter;
 - d) tiga helai kain pembalut berbentuk segitiga (*mitella*);
 - e) satu gulung pengikat pembedahan berukuran 2.54 sentimeter x 2.74 sentimeter;
 - f) satu pasang gunting keluli tahan karat;

- g) satu kotak pin keselamatan;
- h) satu tiub krim antiseptik;
- i) sarung tangan pakai buang;
- j) satu penyepit kapas;
- k) satu botol losyen kuning (*Acriflavine solution*);
- l) pita luka(*band aid plaster*);
- m) ubat paracetamol; dan
- n) satu botol minyak angin / ubat gosok.

4.6 Kawalan Bunyi

- i. Pihak penganjur dikehendaki mengawal kadar bunyi sepanjang program hiburan pada kadar yang sesuai.
- ii. Tahap bunyi hendaklah tidak mengganggu penduduk berdekatan secara keterlaluan.
- iii. Jenis muzik yang digunakan adalah dari jenis yang boleh diterima oleh masyarakat. Muzik dan bunyian keras dan melampau sehingga penonton dan pendengar mengikut rentak (melompat-lompat, menjerit dan bersorak) sehingga merosakkan akhlak dan adab mereka serta mendatangkan fitnah adalah dilarang.

4.7 Kawalan Pengunjung

- i. Mengawal pengunjung dengan menyediakan langkah-langkah kawalan keselamatan bagi mengelakkan sebarang bentuk huru-hara, provokasi dan kegelisahan dalam kalangan pengunjung, mengawal percampuran bebas antara lelaki dan wanita yang bukan mahram secara melampau serta mendapatkan kerjasama pihak berwajib dalam menangani sebarang kecemasan yang mungkin berlaku sepanjang program berlangsung.

- ii. Pihak pengunjung perlu dikawal supaya tidak mengganggu persembahan dan pengunjung lain.
- iii. Pengunjung yang mabuk hendaklah tidak dibenarkan berada di kawasan persembahan.
- iv. Penyediaan tempat khas untuk penonton yang datang secara berkeluarga adalah digalakkan.
- v. Pengunjung tidak dibenarkan berpakaian menjolok mata, kotor, membawa senjata atau apa-apa peralatan yang boleh membawa bahaya.

5. ELEMEN - ELEMEN DAN SYARAT - SYARAT SUKAN

5.1 Atlet – peserta atau pemain yang bergiat dalam apa jua bidang sukan, ahli sukan.

- i. Atlet hendaklah berpakaian menutup aurat bagi yang beragama Islam. Atlet lelaki yang beragama Islam hendaklah berpakaian menutup aurat dengan memastikan antara pusat hingga kedua-dua lutut adalah tertutup. Atlet wanita yang beragama Islam hendaklah menutup seluruh tubuh badan kecuali muka dan kedua-dua telapak tangan. Aurat hendaklah ditutup dengan sempurna tanpa menampakkan bentuk badan atau bayangan daripada luar.
- ii. Atlet yang bukan beragama Islam hendaklah berpakaian sopan dengan maksud pakaian tidak terlalu ketat, singkat atau jarang.
- iii. Pakaian atlet mestilah sopan dan bersesuaian dengan sukan yang diceburi.
- iv. Atlet dilarang untuk terlibat dalam apa sahaja aktiviti yang berunsurkan perjudian, pengambilan alkohol dan bahan-bahan terlarang serta rasuah.

5.2 Jurulatih

- i. Jurulatih dan atlet adalah seelok-eloknya terdiri daripada jantina yang sama.

- ii. Sekiranya berbeza jantina, batas-batas pergaulan antara jurulatih dan atlet adalah selaras dengan tuntutan syarak seperti menjaga maruah diri, akhlak, adab dan tatasusila.
- iii. Bagi acara senamrobik, jurulatih perempuan tidak boleh menunjukkan aksi di hadapan peserta lelaki. Jurulatih perempuan dibenarkan menunjukkan aksi di hadapan peserta perempuan sahaja dan dilakukan di tempat tertutup.
- iv. Jurulatih yang beragama Islam hendaklah berpakaian menutup aurat. Jurulatih lelaki yang beragama Islam hendaklah berpakaian menutup aurat dengan memastikan antara pusat hingga kedua-dua lutut adalah tertutup. Jurulatih wanita yang beragama Islam hendaklah menutup seluruh tubuh badan kecuali muka dan kedua-dua telapak tangan. Aurat hendaklah ditutup dengan sempurna tanpa menampakkan bentuk badan atau bayangan daripada luar.
- v. Jurulatih yang bukan beragama Islam hendaklah berpakaian sopan dengan maksud pakaian tidak terlalu ketat, singkat atau jarang.

5.3 Penganjur

- i. Aktiviti sukan yang dianjurkan tidak menghalang pelaksanaan ibadah wajib seperti solat dan puasa.
- ii. Penganjur hendaklah menyelia atau mengawal perilaku atlet dan penonton daripada melakukan perbuatan-perbuatan haram atau maksiat seperti berpelukan atau bercumbuan antara lelaki dengan wanita yang bukan mahram atau menggunakan arak sebagai lambang kemenangan.
- iii. Tempat bersukan hendaklah disediakan secara berasingan antara lelaki dan wanita atau penggunaannya diatur secara bergiliran mengikut jadual, kecuali acara-acara berpasukan yang terkawal dan tidak menimbulkan fitnah.
- iv. Penganjur hendaklah menyelia dan mengawal sepanjang aktiviti pertandingan daripada berlaku perkara-perkara yang bertentangan dengan syarak seperti penyediaan arak dan pergaulan bebas antara lelaki dan perempuan bukan mahram.

- v. Penganjur hendaklah mengawal keselamatan para peserta dan penonton daripada kejadian yang tidak diingini seperti rusuhan, tindakan ganas dan provokasi.
- vi. Penganjur disyorkan untuk menyediakan tempat berasingan bagi penonton lelaki dan wanita serta ruangan bagi penonton yang datang secara berkeluarga.
- vii. Penganjur hendaklah menyediakan kemudahan asas seperti tandas dan tempat solat.
- viii. Penganjur hendaklah memastikan kebersihan tempat pertandingan sepanjang acara berlangsung.
- ix. Aktiviti sukan yang dianjurkan hendaklah tidak melibatkan pertarungan atau perjudian dan penggunaan bahan-bahan terlarang mahupun perkara yang memabukkan dan memudaratkan serta peralatan atau bahan yang merbahaya.
- x. Penganjur hendaklah menyediakan pegawai perubatan yang bertauliah bersama-sama alat dan kelengkapan yang mencukupi sepanjang tempoh sukan berlangsung.

6. SUKAN YANG TIDAK DIBENARKAN

- 6.1 Sukan-sukan yang berisiko tinggi dan boleh menyebabkan kemudaratan kepada fizikal, mental dan spiritual serta tidak memberi manfaat kepada para atlet, penganjur dan orang awam adalah dilarang.
- 6.2 Sukan-sukan yang tidak selari dan bercanggah dengan hukum syarak juga dilarang.
- 6.3 Contoh-contoh sukan yang tidak dibenarkan ialah pertandingan makan makanan eksotik seperti kata jengking, labah-labah dan seumpamanya serta pertandingan memakan benda-benda yang haram, najis, kotor, menjijikkan dan seumpamanya.

7. PELESENAN

- 7.1 Sesuatu hiburan dan sukan tidak boleh diadakan tanpa kebenaran daripada Pegawai Pelesen yang dilantik oleh Pihak Berkuasa Negeri.
- 7.2 Lesen hanya boleh dikeluarkan bagi jenis hiburan dan sukan yang dikawal selia sahaja dan tertakluk kepada budi bicara pegawai pelesen

dengan syarat-syarat tertentu. Lesen hiburan dan sukan hanya boleh dikeluarkan berserta dengan lesen tempat hiburan dan sukan daripada pegawai pelesen berkaitan dalam tempoh yang ditetapkan.

- 7.3 Borang permohonan lesen hendaklah dikemukakan dalam tempoh sekurang-kurangnya tiga puluh (30) hari bekerja sebelum dari tarikh hiburan dan sukan yang hendak diadakan.
- 7.4 Permohonan lesen yang dikemukakan kepada Pegawai Pelesen berkenaan hendaklah mendapat surat sokongan daripada pihak polis sebelum surat kelulusan dikeluarkan.
- 7.5 Pegawai Pelesen boleh membuat apa-apa urusan pentadbiran tambahan sebelum menimbang dan melulus sesuatu permohonan seperti mendapat pandangan dan maklumat tertentu seperti berikut:
- i. Orang-orang yang terlibat dalam penganjuran program ini.
 - ii. Orang-orang yang mengambil bahagian dalam persembahan di dalam program ini.
 - iii. Susunan pengisian program ini meliputi aturcara, skrip, lagu dan deraf ucapan.
 - iv. Jangkaan kehadiran pengunjung atau penonton.
 - v. Lokasi cadangan program dan pelan lokasi.
 - vi. Cadangan masa program.
 - vii. Ulasan dan pandangan teknikal dari Polis Diraja Malaysia, Pejabat Agama Jajahan Negeri Kelantan, Pejabat Penggawa dan sebarang jabatan yang berkaitan.
 - viii. Lain-lain tambahan syarat yang diperlukan mengikut kesesuaian permohonan dari semasa ke semasa.
- 7.6 Cagaran akan dikenakan terhadap pemohon yang telah diluluskan lesen hiburan berdasarkan Enakmen Kawalan Hiburan dan Tempat-Tempat Hiburan (Kelantan) 2025.
- 7.7 Program hiburan dan sukan lain adalah tidak dibenarkan kecuali program yang dinyatakan berdasarkan kelulusan lesen hiburan sahaja.

7.8 Masa Hiburan dan Sukan

- i. Tiada sebarang aktiviti hiburan dan sukan dibenarkan diadakan pada masa yang ditetapkan di dalam Jadual Kedua Peraturan-Peraturan Kawalan Hiburan dan Tempat-Tempat Hiburan (Kelantan) 2025 melainkan dengan kebenaran Pihak Berkuasa Negeri.
- ii. Program hiburan dan sukan boleh dijalankan bermula jam 8.00 pagi hingga 12.00 malam dan tidak mengganggu perjalanan ibadat solat bagi umat Islam yang berhampiran. Program hiburan dan sukan hanya boleh dijalankan diluar jam 8.00 pagi hingga 12.00 malam dengan membuat permohonan lanjutan dan permohonan tersebut hendaklah diluluskan oleh Pegawai Pelesen.
- iii. Program hiburan dan sukan hendaklah diberhentikan 15 minit sebelum masuk setiap waktu solat.
- iv. Program hiburan dan sukan pada sebelah malam hendaklah bermula selepas Isyak sehingga 12.00 malam.

7.9 Tempat Hiburan dan Sukan

- i. Tempat penganjuran hiburan atau sukan hendaklah di tempat yang sesuai dengan hiburan atau sukan itu dipersembahkan atau dimainkan dan tidak menyebabkan kacau ganggu.
- ii. Tiada hiburan dan sukan boleh dianjurkan dalam jarak 200 meter dari rumah ibadat kecuali hiburan berunsur keagamaan tertakluk kepada budi bicara Pegawai Pelesen.

8. PENGECUALIAN

- 8.1 Kerajaan Negeri boleh mengecualikan mana-mana jenis atau kelas hiburan dan mana-mana tempat hiburan daripada peruntukan Enakmen Kawalan Hiburan dan Tempat-Tempat Hiburan (Kelantan) 2025 serta mana-mana acara sukan yang hendak dijalankan di Negeri Kelantan berdasarkan Seksyen 45 Enakmen Kawalan Hiburan dan Tempat-Tempat Hiburan (Kelantan) 2025.
- 8.2 Penganjur yang telah diberi pengecualian daripada Kerajaan Negeri masih lagi perlu membuat permohonan untuk mendapatkan lesen hiburan dan lesen tempat hiburan dengan Pegawai Pelesen.

- 8.3 Hiburan dan tempat hiburan serta sukan yang boleh dikecualikan ialah:-
- 8.3.1 Acara yang berbentuk adat, tradisi dan agama lain selain Islam.
 - 8.3.2 Acara rasmi kebudayaan, pelancongan Negeri dan perasmian program seumpamanya yang dianjurkan oleh Pihak Berkuasa Negeri, Pihak Berkuasa Tempatan atau Kerajaan Persekutuan.
 - 8.3.3 Acara-acara hiburan tertentu yang akan ditentukan dari semasa ke semasa.
 - 8.3.4 Acara-acara sukan tertentu bagi tujuan persembahan.
 - 8.3.5 Acara hiburan dan sukan yang dianjurkan sendiri oleh Pihak Berkuasa Negeri atau mana-mana jabatan di bawah Pihak Berkuasa Negeri dan Pihak Berkuasa Tempatan.
- 8.4 Pegawai Pelesen masih berhak mengenakan syarat-syarat terhadap acara hiburan dan sukan yang telah meperoleh pengecualian.

9. PEMAKAIAN


- 9.1 Garis Panduan ini ditujukan kepada semua Pegawai Pelesen hiburan, agensi-agensi penguatkuasaan undang-undang dan pihak awam yang berkepentingan.
- 9.2 Garis panduan ini juga hendaklah dibaca bersama dengan Garis Panduan Kawal Selia Penganjuran Pertandingan Sukan dan Pertunjukan Seni Mempertahankan Diri Muay di Negeri Kelantan.

10. TARIKH BERKUATKUASA

- 10.1 Garis Panduan dan Pekeliling ini berkuatkuasa serta merta apabila mendapat kelulusan daripada Pihak Berkuasa Negeri.
- 10.2 Pekeliling Am Negeri Bilangan 4 Tahun 2003, Garis Panduan Kawalan Hiburan 2003 adalah dibatalkan.

11. RUJUKAN


- 11.1 Pekeliling Am Negeri Bilangan 4 Tahun 2003, Garis Panduan Kawalan Hiburan 2003.
- 11.2 Garis Panduan Persembahan Hiburan dalam Kawasan Majlis Perbandaran Kota Bharu Bandar Raya Islam.
- 11.3 Garis Panduan Hiburan, Persembahan Kebudayaan, Pelancongan dan Sukan Negeri Terengganu.
- 11.4 Garis Panduan Hiburan Melibatkan Pertunjukan Pentas Majlis Daerah Kuala Langat 2007.
- 11.5 Garis Panduan Hiburan dalam Islam Edisi Kedua oleh Jabatan Kemajuan Islam Malaysia (JAKIM) 2014.
- 11.6 Garis Panduan Bersukan Menurut Perspektif Islam oleh Jabatan Kemajuan Islam Malaysia (JAKIM) 2015.


.....
(HJ. AHMAD ADLEE BIN YASIN)

TIMBALAN SETIAUSAHA KERAJAAN (PEMBANGUNAN)

Bertarikh : 10/09/2025

CARTA ALIR PERMOHONAN LESEN HIBURAN DAN TEMPAT HIBURAN DI NEGERI KELANTAN



CARTA ALIR PERMOHONAN PENGECUALIAN DAN TARAF EKSKLUSIF

